

25. Oktober 2018

2020 nallertinnagu ullukinnerup ulloq 21. decembarip pisortatigoortumik nalliussineqartaler-nissaanik atulersitsinissaq pillugu Inatsisartuni aalajangiiffigisassatut siunnersuut.

(Inatsisartuni ilaasortaq Peter Olsen, Inuit Ataqtigiit)

Siunnersuuteqartoq Peter Olsen, Inuit Ataqtigiit. Siunnersuutaanut qujararluta Siumumiit imak oqaaseqassaagut.

Ukiopassuarni Inuit oqaluttuarisaanitsinni ullut pingaartillugit nalliussisakkatta ilagaat – Ullukinneq. Nunarsuup avannaarsuani issittormiuulluta ukiup taarnerpaaffianiit seqernup qummut aallaqqinnerata nalliuttorsiuutigisarnera siulersuatta ingerlattuarsimasaat aamma uagut ullumikkut inooqataasut amerlaqisugut ilaqutariittut ikinngutigiiittut ilaatigullumi piffiit ilaanni inoqarfikkaartut pisortatiguunngikkaluamik nalliuttorsiorfigisarpaput. Aamma kristumiunngornitta kingorna kristumiutut nalliuttorsiorfariit saniatigut inuiaqatigiinni amerlaqisut Ullukinneq nalliuttorsiorfariittut ileqqutut ingerlarlattuarpaat, nereqatigiinnikkut naapeqatigiinnikkut, immitsinnullu pilluaqusaannikkut, tassuuna takuneqarsinnaavoq Ullukinneriortarneq qanoq nakuutigaluni inuiaqatigiinni kalaallini inissisimasoq.

Siunnersuutigineqartoq siumumiit ilassilluarparput, aammalu isumaqarluta Inuiaqatigiittut pingaartitatta naleqartitattalu ilaasa ajunngitsumik alloriarfiginissaannut periarfissiisoq.

Siumumiillu isumaqarpugut pisortatigoortumik nalliussisarnissaa pillugu inuiaat matuminnga aperineqaqqaartariaqartut, soorluttaaq Inuiattut Ullorsiorfarnissaq pillugu taamaasiortoqarsimasoq. Taamaattumik aalajangiinnginnermi tusarniaanissaq pingaartillugu inuiaqatigiit isumaat tusaasariaqarpagut.

Ullukinneq pisortatigoortumik ullorsiorfarnissaq soorunami suliffiusussaangitsutut aaqqissuunneqartariaqassaaq taamaalilluni suliffeqarfinnut qanoq kalluaatiginissaa paasisaqarfigissallugu aamma pingaartipparput. Siumumiit aamma isumaqarpugut pinngitsoorani aningaasarsiornikkut sunniutigisinnaasai aamma paasissallugit pingaaruteqartoq.

Naalakkersuisut akissutaatigut oqaatigineqartut Ullukinneriortarneq ullunut erfalasulerfiusinnaasunut ilaavoq, tamanna namminermini ajunngilaq. Kisiannmi pisortatigoortumik nalliuttorsiuutaasalernissaanut aaqqissuussisinnaaneq allaalluni.

Taamak naatsumik oqaaseqarluta siunnersuutip aappassaaneerneqannginnermini ataatsimiititaliamit susasaqartumit suliarineqarnissaa innersuupparput.

Laura Táunâjik, Siumut